

SAMÞYKKT

um hæsnahald í Reykjavík, utan skipulagðra landbúnaðarsvæða.

1. gr.

Samþykkt þessi gildir um hæsnahald í Reykjavík á svæðum sem ekki eru skipulögð landbúnaðarsvæði og þar sem hæsnahald hefur ekki verið sérstaklega bannað eða þinglýstar kvaðir eru á húseignum sem koma í veg fyrir að þar séu haldin hænsni. Samþykktin er sett til að tryggja öryggi, hollustuhætti, góða umgengni og fullnægjandi mengunarvarnir vegna hæsnahalds í þéttbýli í Reykjavík.

2. gr.

Sækja þarf um leyfi heilbrigðisnefndar til hæsnahalds í Reykjavík sbr. 2. gr. samþykktar nr. 426/2003 um takmörkun búfjárhalds og bann við lausagöngu búfjár í Reykjavík. Með umsókn skal fylgja skriflegt samþykki nágranna sem eiga aðliggjandi lóðir. Ef um fjöleignarhús er að ræða skal að auki liggja fyrir samþykki sameigenda, sbr. lög nr. 26/1994 um fjöleignarhús. Sé umsækjandi leigjandi skal fylgja samþykki leigusala.

Nú telur heilbrigðisnefnd, að skilyrði til hæsnahalds séu fyrir hendi og getur hún þá veitt lögráða einstaklingi eða lögaðila leyfi til tiltekins tíma. Áður en leyfi er veitt skal gengið úr skugga um að tilskilin leyfi byggingar- og skipulagsyfirvalda liggja fyrir. Við leyfisveitingu skal heilbrigðisnefnd afhenda leiðbeiningar og setja leyfishafa skilyrði um geymslu, notkun og förgun hæsnaskíts.

Ekki er veitt leyfi til hæsnahalds hafi umsækjandi gerst brotlegur við lög um velferð dýra.

3. gr.

Byggingarleyfi fyrir hæsnakofa og girðingar við þá er háð gildandi ákvæðum byggingarreglugerðar eins og hún er á hverjum tíma.

4. gr.

Lausanga hæсна er með öllu óheimil og ber hæsnæigandi fulla vörsluskyldu. Hæsnæigandi er að öllu leyti ábyrgur fyrir hæsninum sínum og ber að koma í veg fyrir að hæsnahaldið valdi ónæði í umhverfinu, s.s. vegna hávaða, ólyktar og hvers konar óþrifnaðar. Hæsnæiganda ber einnig að sjá til þess að hæsnahaldið laði ekki að meindýr.

5. gr.

Sleppi hæna frá eiganda eða umráðamanni skal viðkomandi tafarlaust gera ráðstafanir til að handsama hana. Hænur í lausagöngu skal færa í geymslu á vegum Reykjavíkurborgar. Ef hænu er ekki vitjað innan einnar viku frá handsömun, er heimilt að ráðstafa henni til nýs eiganda eða selja hana fyrir áföllnum kostnaði. Að öðrum kosti skal hún aflífuð.

Hafi hæna verið handsömuð, er óheimilt að afhenda hana fyrr en að lokinni greiðslu áfallins kostnaðar. Sé eigandi ekki með leyfi fyrir hæsnahaldi skal afla leyfis og greiða það áður en hæna fæst afhent. Kostnaður við handsömun, geymslu eða aflífun hænu skal að fullu greiddur af eiganda.

6. gr.

Leyfilegt er að halda allt að 4 hænur á hverri lóð. Óheimilt með öllu er að halda hana.

7. gr.

Á lóðum þar sem veitt er leyfi til hæsnahalds þarf að vera hæfilega stór hæsnakofi sem rúmar þann fjölda af hænum sem leyfi er veitt fyrir. Hæsnakofi fyrir 4 hænur þarf að vera að lágmarki 2 m² að stærð. Í kringum hæsnakofa skal vera hæsnahelt gerði, hæfilega stórt fyrir útiveru hæsnanna. Hæsnakofi og gerði skulu vera vel innan lóðarmarka viðkomandi lóðar, að lágmarki 3 m.

8. gr.

Umráðamanni/leyfishafa ber að gera ráðstafanir til að tryggja að meindýr komist ekki í fóður. Hænsnakofi skal vera meindýraheldur. Hænsnafóður skal geyma í meindýraheldum ílátum. Til að fyrirbyggja að rottur komist í fóður skulu ílát vera í a.m.k. 35 sm hæð frá jörðu og vera u.þ.b. 60 sm djúp.

Til að koma í veg fyrir ónæði vegna hávaða ber að hafa myrkur hjá hæsnunum frá kl. 21.00 til kl. 7.00 alla daga.

Þrifa þarf hænsnakofa að lágmarki vikulega. Hænsnaskít skal fjarlægja við daglega umhirðu og má ekki safnast upp. Farga skal hæsnaskít á löglegan hátt. Heilbrigðisnefnd setur leyfishafa nánar skilyrði um geymslu, notkun og förgun hæsnaskíts, sbr. 2. gr.

9. gr.

Heilbrigðisnefnd getur afturkallað leyfi til hæsnahalds samkvæmt samþykkt þessari ef hæsnahaldið veldur ónæði í umhverfinu, ofnæmi, leyfishafi gerist brotlegur við lög um velferð dýra eða ef brotið er gegn samþykkt þessari.

10. gr.

Komi upp sjúkdómar eða smithætta sem að mati sóttvarnarlæknis og yfirdýralæknis geta skapað hættu fyrir heilbrigði manna, ber að hætta hæsnahaldi tafarlaust og farga hænunum í samráði við heilbrigðisnefnd.

11. gr.

Um þvingunarúrræði og viðurlög við brotum gegn ákvæðum samþykktar þessarar fer samkvæmt VI. kafla laga nr. 7/1998, um hollustuhætti og mengunarvarnir.

12. gr.

Heimilt er að innheimta leyfisgjald af hæsnaeigendum og árlegt eftirlitsgjald vegna almenns eftirlits sbr. 25. gr. laga nr. 7/1998 um hollustuhætti og mengunarvarnir. Umráðamaður/leyfishafi ber einnig allan kostnað sem kann að hljóta af handsömun, fóðrun og hýsingu hænanna. Gjaldtakan skal ákveðin í gjaldskrá heilbrigðisnefndar sem staðfest er af borgarstjórn Reykjavíkur og birt í B-deilda Stjórnartíðinda.

13. gr.

Samþykkt þessi staðfestist hér með skv. 25. gr. laga nr. 7/1998, um hollustuhætti og mengunarvarnir, og öðlast þegar gildi.

Umhverfis- og auðlindaráðuneytinu, 1. september 2014.

F. h. r.

Sigurbjörg Sæmundsdóttir.

Laufey Helga Guðmundsdóttir.